



Lugo, 9 de febreiro de 2012. Parte da gran degradación paisaxística, biolóxica e cultural que estamos a sufrir no país é debida ás **permisivas normativas forestais** que ao longo dos

anos favoreceron a destrución total ou parcial de grandes e pequenas superficies de carballeiras e outras masas forestais autóctonas, que logo mudaron de uso e foron transformadas en plantacións de piñeiros ou eucaliptos. ADEGA demándalle á Xunta que a nova [Lei de](#)

[Montes](#)

limite as cortas a feito das fragas, que non permita a súa restitución por especies de crecemento rápido e que faga cumprir a lexislación xa existente neste senso. O contrario suporía perpetuar o

"franquismo forestal

" en forma de máis monocultivos en detrimento da floresta autóctona e da diversidade natural e paisaxística galega.



Dende ADEGA preocupámanos que a futura **Lei de Montes** de Galiza, que está a punto de ser debatida no Parlamento Galego, siga permitindo estas desfeitas. Tanto na regulación actual como na futura lei, nos seus artigos 60 e 67, continúaase a

permitir a repoboación con piñeiros

(non así con eucaliptos), tras a tala de fragas ou masas forestais autóctonas. Porén, entendemos que a nova normativa debера garantir a conservación e a rexeneración natural das masas autóctonas obrigando a manter as zonas taladas de bosque autóctono con especies frondosas e prohibindo a súa substitución por piñeiros e eucaliptos.

Para ADEGA tamén é preocupante que este proxecto de lei siga permitindo a **corta a feito** destas masas forestais sen establecer ningún tipo de condicionante ou limitación clara e obxectiva para favorecer a conservación e o fomento dos bosques frondosos. ADEGA demándalle ao goberno que a nova normativa impida a corta a feito de calquera carballeira e que, como alternativa, prime as entresacas selectivas ou rareos, co obxectivo de non afectar gravemente nin ao solo, nin a biodiversidade, nin a paisaxe ligada a estes bosques.



Así mesmo, demandamos máis vixianza das zonas nas que se están a outorgar **permisos de cortas**, dado que a meirande parte de propietarios están a talar os bosques de frondosas para logo repoboalos con eucalipto, algo que xa está expresamente prohibido polo *Decreto 81/1989 sobre medidas de ordenación das novas plantacións co xénero eucaliptus*. Pese a esta prohibición con rango de lei e os numerosos casos denunciados por ADEGA ante a Consellaría competente, a Xunta non está a castigar como corresponde este tipo de infraccións nin tampouco amosa vontade para aplicar este regulamento que é de obrigado cumprimento.

Por todo o dito, ADEGA pídelle á Consellaría de Medio Rural e ao goberno galego no seu conxunto que amosen realmente vontade de preservar as masas forestais propias do país limitando as cortas a feito, **prohibindo a súa substitución por especies de rápido crecemento** e facendo cumprir a lexislación que xa está en vigor neste senso.